

Riječ generalnog revizora Ureda za reviziju institucija u FBiH

Generalni revizor Ureda za reviziju Dževad Nekić istekom mandata zahvaljuje se predstavnicima medija, stručnoj i akademskoj zajednici i organizacijama civilnog društva na saradnji, podršci i praćenju rada Ureda za reviziju institucija u FBiH.



Ured za reviziju institucija u FBiH je vrhovna revizijska institucija, čija misija je da bude nezavisni vrhovni revizijski autoritet Federacije Bosne i Hercegovine i pokretač promjena u životima građanki i građana, tako što svojim radom unapređuje sistem finansijskog upravljanja i kontrole, te doprinosi većoj odgovornosti i transparentnosti u javnom sektoru.

U toku mog mandata od 2016. do 2024. godine Ured za reviziju je nastavio ranije zacrtani put ka jačanju i daljem razvoju nezavisne revizije javnog sektora. Ojačali smo nezavisnost, povećali transparentnost u našem radu, udvostručen je broj revizija, prvi put su revidirani određeni subjekti javnog sektora, povećan je broj stručnog revizorskog osoblja i uvedeni su brojni noviteti u radu.

Ništa manje važna je i izgradnja našeg imidža na međunarodnom polju, gdje smo postali jednak partner kada je u pitanju razvoj revizorske profesije, sa našim predstavnicima na međunarodnim odborima i radnim grupama.

Uspostavili smo saradnju sa akademskom zajednicom, sa željom za dijalogom i da mladima otvorimo nove mogućnosti.

Podržavali smo rad organizacija civilnog društva, onih koje se bore za pravnu, demokratsku državu i bolju budućnost. Jer to je i naša misija i uloga – da budemo uspješna i uzorna institucija koja treba još puno uraditi kako bismo imali okruženje u kojem pravda i pravednost vladaju.

U svojstvu odlazećeg generalnog revizora, želim da se najprije zahvalim svim zaposlenicima i zaposlenicima, sadašnjim i bivšim, koji su doprinijeli radu Ureda, svim kolegama iz zajednice vrhovnih revizijskih institucija, predstavnicima zakonodavne i izvršne vlasti, predstavnicima medija koji su objektivno prenosili naš rad, akademskoj zajednici i organizacijama civilnog društva, na izuzetnoj saradnji koju smo ostvarili u posljednjem periodu.

Vaš angažman, stručnost i objektivnost od ključnog su značaja za postizanje zajedničkih ciljeva i unapređenje društvenih, kulturnih i profesionalnih vrijednosti. Kroz vašu podršku, informisanje i promovisanje revizorskog rada doprinosite ne samo našoj misiji, već i širem društvenom napretku. Jake institucije su stubovi države, a svako kome je to cilj, u okviru svojih nadležnosti i napora, može doprinijeti njihovoj izgradnji.

Uspjeh bilo kojeg projekta ili inicijative nije moguć bez sinergije i zajedničkog rada svih aktera u društvu. Vaša posvećenost, profesionalizam i odgovornost omogućili su nam da zajedno ostvarimo rezultate koji će sigurno imati dugoročan pozitivan uticaj na javni sektor i društvo u cjelini.

Želim uspješan rad novom menadžmentu, u nadi da će i oni, zajedno sa zaposlenicima, koji su najveći potencijal, nastaviti graditi i jačati Ured. Nove generacije i novi lideri trebaju da istražuju nove načine i razvijaju inovativne metode, kako bi ostali relevantni i držali korak s vremenom.

S poštovanjem,

Dževad Nekić, mr. oec. sc.

